

(1344) März 3.

Exellentissime¹ princeps et domine amantissime.

In generalem Christi fidelium noticiam iam est diu devenit, quod dilecti fratres ordinis Predicatorum, Redemptoris nostri speciales filii et precones, in partibus Alamanie et terris vobis subiectis de XVII conventibus fuerunt proscripti pariter et banniti, ex eo quod olim adhererunt^a et inconcusse adherent processibus sancte Romane ecclesie, servando continue interdictum positum per plures Romanos pontifices in partibus antedictis, et ob hoc fratres ipsi dampna plurima et dampnosa dispendia temporalia et spiritualia sunt pluribus annis in partibus eisdem perpassi, cum ibi locus tutus eis pro refugio non remaneat, set tanquam profugos eos oporteat per diversas regiones dispergi. Quia igitur ad fratres predictos, qui sub extrema paupertate viventes per ministerium suum salutem animarum procurant, extendamus totis visceribus nostre caritatis affectum, vestram magnificentiam ex corde duximus presentibus deprecandam, quatinus pro divina et apostolice sedis reverencia et obtemptu precum nostrarum fratres eosdem habeatis in suis neccessitatibus commendatos, ut scilicet libere et absque difficultatis obstaculo per vos et vestros permittatis eos ad omnes conventus unde banniti fuerunt redire, ut quocius et liberius Redemptori nostro valeant famulari. Congruit enim, quod^b principes et reges fideles tales religiosos habeant familiares, quod ipsorum curia ex familiaritate huiusmodi reddatur sincera, ut inde eis divine gratie premium et favoris Romane ecclesie proveniat incrementum. Ad tollendum autem adversa quolibet de terris vestris parati sumus toto conamine laborare.

Datum Auinion., III. die mensis Marcii.

Vester Hymbertus
dalphinus Viennen.

Pergament. Rückwärts keine Adr., also wohl der Correcturen wegen nicht ausgefertigtes Original.

a) so Or. b) über der Zeile nachgetr. Or.

1) Die Orthographie ist genau beibehalten. 1344 ist der Delfin in Avignon.
